

Riječ Redakcije

Cijenjeni čitatelji !

SA RADOŠĆU vam predajemo na čitanje treći broj časopisa *Historijska traganja* za 2009. godinu. Izostajanje redovnih rubrika je zbog tematske koncepcije ovoga broja koji je posvećen devedesetoj obljetnici stvaranja Kraljevine Srba, Hrvata i Slovenaca. Prezentirani izvorni i pregledni naučni radovi su autorizirana izlaganja sa okruglog stola koji je u okviru Tribine Instituta za istoriju u Sarajevu održan 1. 12. 2008. godine pod naslovom *Godina 1918. – bosanskohercegovačko iskustvo*. Tom prigodom organizirana je i tematska izložba o kojoj donosimo informaciju sa nekoliko ilustracija.

Bosanskohercegovačko iskustvo u 1918. godini kao istinskoj povijesnoj prekretnici je uvijek inspirativna tema za historičare bilo da se istražuje državno-politički ustroj, pravna regulativa, nacionalno pitanje općenito ili svakog naroda pojedinačno, zatim represija državnog aparata, organiziranje svakodnevnog života u gradovima ili na selu, ali i siromaštvo, oskudica, kontrolirano snabdjevanje, učešće Bosanaca i Hercegovaca u vojnim jedinicama Austro-Ugarske monarhije, agrarno pitanje, ukidanje kmetstva, odnosno feudalnih odnosa na početku 20. stoljeća, odnos prema useljenim strancima, položaj vjerskih zajednica i odnos njihovih prvaka prema novoj vlasti, osnivanje političkih stranaka i političkog pregrupiranja, pokretanje novina, kulturni život itd. Mnoga su pitanja ostala istraživački nedovršena, a tiču se formiranja i funkcioniranja prve Jugoslavije i mjesta Bosne i Hercegovine u njoj. Koliko je arhivske građe ostalo svjedočiti o tom razdoblju bosanskohercegovačke historije? Dovoljno da osjetimo jezu zbog oštećenih dijelova povijesnog mozaika.

Nedosljednost u skupljanju, čuvanju i arhiviranju pisanih dokumenata također svjedoči o vremenu u kojem se živjelo i radilo u Bosni i Hercegovini.

Kao i za prethodna dva broja, pozivamo vas na suradnju u pronalasku tragova prošlosti, njihovom prezentiranju i učenju o nama i drugima.

Redakcija